

Promer director di Idefre y pionero den deporte

Sr. Roy van Putten a bai laga nos



UN noticia tristo pero conforme cu naturaleza den bida, a drenta diaranzon anochi ora cu trahadornan di IDEFRE

y comunidad deportivo na Aruba a haya tende cu Sr. Roy van Putten a fayece, un di e dirigentenan di deporte mas im-

portante cu historia di deporte Arubano a conose.

Roy van Putten cu su Master Degree den Educacion Fisico y gradua na Springfield College Massachussets Merca, a cuminsa traha banda di Frans van Gastel rond di 1978/79 como counterpart den e lantamento di un departamento di deporte y recreacion pa gobierno insular di Aruba ya cu for di e tempo ey caba e desaroyonan riba tereno di deporte nacional tabata rekeri algo asina. E departamento den cual nan tabata funciona tabata yama Sportbureau.

Despues cu Sr. van Gastel su contrato a termina, Roy van Putten a sigui cu e preparacionnan y asina e institucion IDEFRE a lanta oficialmente na 1981. Na mando di IDEFRE y cu un team di trahador chiquito pero bon motiva, deporte pa un y tur a cuminsa dreì na Aruba. Programanan manera instruccion deporte den bario, competencianan di deporte escolar, deporte intergubernamental, programa vacacional cu centro di bario y tambe e maneho di hotel deportivo tabata local IDEFRE a cuminsa cune sin lubida e adkision di material di deporte cu tabata ser reparti entre scolnan basico y avansa pa nan por cumpli cu nan lesnan di deporte.

Riba tereno internacional Roy van Putten a percura pa Aruba mediante IDEFRE bira miembro di organisacionnan entre

otro Instituto Panamericano di Educacion Fisica (IPEF), y International Council for Physical Education and Recreation (IHCPER). Na 1984 IDEFRE a organisa e Conferencia di CACEFI cual ta e organizacion internacional di educacion fisico pa handicap y esaki tabata danki na esfuerzonan di e director di IDEFRE. Mas di 200 delegado di nos region a asisti. Na aña 1985 Sr. Roy van Putten a baha cu pensioen pa bai dedica su mes na otro tipo di trabounan cu den su mayoria tabata tin di haber cu deporte.

Bou guia di Roy van Putten IDEFRE a yuda lanta of reactiva varios deporte.

E deporte di korfbal cu un tempo tabata popular y despues a cai, a haya un empuje cu un torneo di estimulacion cu a duna como resultado cu e diferente teamnan a disidi di reactiva e federacion y cuminsa dreì campeonato den comienso den final di añanan 70 cuminando 80. E deporte di ciclismo tambe a ser reactiva mediante esfuerzonan di IDEFRE. Asina por mencion tambe e actividad di caminata, y handicap sport. IDEFRE tabata pionero cu organizacion di e promer triathlon na Aruba na aña 1984 cu despues a bira un federacion. Kisas un di e logronan mas grandi di Roy van Putten tabata na 1984 ora cu a yama un reunion cu tur federacion afilia na ASU pa duna informacion y stimula e grupo aki pa cuminsa prepara

nan mes pa lanta local ta awe Comité Olimpico Arubano.

Ainda na e IDEFRE di awe tin algun trahador cu a traha den tempo di Roy van Putten y cu tin masha hopi aprecio no solamente pa su forma di traha y comunica pero tambe pa e oportunidadnan cu tabata ser duna na nan. Pero mester bisa si cu Roy van Putten como director tabata exihente den trabou, produccion, puntualidad y disciplina tabata un “must” pero tambe e tabata un mentor pa nos tur y hopi a ser siña for di e gran dirigente aki cu awe no tey mas cu nos. Roy tambe tabata masha humoristico y humanitario cual tabata cualidades resaltante den su persona.

IDEFRE a haya yamadanan y bishita di diferente ex-trahador cu a comunica nan palabranan di condolencia y aprecio pa e tempo cu nan a traha cu Roy van Putten.

Na IDEFRE no solamente Roy ta wordo recorda como ex-director pero tambe como tata di colega Jacqueline Ponson van Putten cu ta e herencia cu e dirigente, lider, educador, y consehero aki ta laga atras banda di tur su logronan na IDEFRE.

Staf y personal di IDEFRE ta expresa palabranan di sincero y profundo condolencia na famianan di e fayecido Roy van Putten cu semper lo keda graba den nos memoria.